

四庫全書

史部

欽定四庫全書

史部  
齊乘卷一

詳校官編修<sub>臣</sub>曹振鏞

檢討<sub>臣</sub>德生覆勘

總校官檢討<sub>臣</sub>何思鈞

校對官監本<sub>臣</sub>張曾炳

謄錄監生<sub>臣</sub>王思誦

欽定四庫全書

史部十一

齊乘

地理類三

都會郡縣之屬

提要

臣等謹案齊乘六卷元于欽撰欽字思容青州人歷官兵部侍郎是書專記輿地凡分八類曰沿革曰分野曰山川曰郡邑曰古蹟曰亭館曰風土曰人物敘述簡核而淹貫地志中之有古法者其中間有舛誤如宋建隆三

年改濰州置北海軍以昌邑縣隸之乾道三年復陞濰州又增昌樂隸之均見宋史地理志而是書獨遺漏未載又壽光為古莒國亦不及詳其他如以華不注為磨笄山以臺城為在濟南東北十三里顧炎武山東考古錄皆嘗辯之然欽本齊人援據經史考證見聞較他地志之但據輿圖憑空言以論斷者實為詳確可信故向來推為善本卷首有至元

五年蘇天爵序亦亟稱之云乾隆四十五年

二月恭校上

總纂官

臣紀昀

臣

陸錫熊

臣

孫士毅

總校官

臣

陸

費

臣

墀



齊乘原序

齊乘六卷故兵部侍郎于公志齊之山川風土郡邑城郭亭館丘壠人物而作也古者郡各有志中土多兵難書弗克存我國家大德初始從集賢待制趙忭之請作大一統志蓋欲盡述天下都邑之盛書成藏之祕府世莫得而見焉于公生于齊官于齊考訂古今質以見聞歲久始克成編辭約而事核公在中朝為御史憲臺都事左司員外郎終益都田賦總管以文雅擅名當時旣

卒其家蕭然獨遺是書于其子潛余官維揚始得閱之  
嗚呼齊地之彊民物之夥自古然也桓公任管仲以成  
霸業聖人嘗稱其功謂一變能至於魯後世去古雖遠  
山川郡邑猶存草其俗以化其民獨不在夫上之人乎  
當漢之始兵戈甫定曹參為齊相師禮蓋公以清靜化  
民齊乃大治茲非其效歟今齊為山東重鎮所統郡縣  
五十有九宦游于齊者獲是書觀之寧無益乎予於于  
公之言重有感焉謂三代兩漢人材卒乎學校之教養



謂風俗自漢晉以降愈變而愈下美昔人之賑饑有道  
歎近世之採金病民以糴下學術流于異端以海上求  
仙惑于神異斯亦足以慨公之志矣夫公諱欽字思容  
益都人潛擢南行臺掾云至元五年己卯冬十月丙戌  
朔嘉議大夫江淮東道肅政廉訪使蘇天爵序



欽定四庫全書

齊乘卷一

元 于欽 撰

沿革

帝嚳九州之制青州初履海岱禹貢九州曰海岱惟  
青州謂東北跨海西南距岱少陽之方其色為青故  
以名也舜肇十二州以青越海析遼東為營商制九  
有以青為徐周官職方以徐為青其東北為幽州齊  
則囊括青州襟帶徐兗幽營非所兼也古之國于此

者少昊之世有爽鳩氏虞夏有季荊商有逢公柏陵  
薄姑氏皆為諸侯周武王克商封太公呂尚于齊未  
得薄姑之地成王時薄姑與四國作亂成王滅之益  
封太公遂有全齊漢志曰齊所以為齊以天齊也蓋  
臨淄有天齊淵以此建國命名耳管仲曰昔召康公  
命我先君太公曰五侯九伯汝實征之以夾輔周室  
賜我先君履東至于海西至于河南至于穆陵北至  
于無棣

穆陵即大峴山或以為泰山南龜山北之穆陵山非也或又以為兗州固始縣南之穆陵

關不應如是之遠元和志云齊陳二境置此關以為防禁隋平陳始廢然則南北朝之關塞耳以為古齊履可

蘇秦曰齊南有泰山東有琅邪西有清河北有渤海四塞之國地方二千里此其疆域也太公後二

十九世彊臣田和篡齊自立五世為秦所滅始皇郡

縣天下始置齊郡又析置琅邪

沂密

秦以齊分為三齊

王田都據臨淄齊北王安據博陽膠東王市據即墨

故號三齊

劉貢父云益都為天齊濟南為中齊沂海為南齊非是

漢高初假韓

信繼封子肥為齊王有齊七十餘城後置青州刺史

部領齊郡北海千乘濟南平原東萊膠東高密淄川郡國凡九而不常所理琅邪東海則為徐州之郡遼

東邊郡嘗來屬焉

光武十三年以遼東屬青州二十四年還屬幽州

三國時

齊為魏有晉置青州刺史領齊國濟南樂安城陽東萊五郡而理臨淄琅邪東莞亦為徐郡永嘉之亂青及徐州之半陷于劉曜石勒厥後慕容燕苻秦迭據其地秦敗苻朗以青州降晉改置幽州以辟閭渾為刺史鎮廣固隆安四年為慕容德所陷德稱南燕定

都廣固二世為劉裕所滅西濟東海復為晉土而祚  
移于劉氏矣劉宋置青冀二州青理臨淄冀理歷城  
至明帝時二州及琅邪之地竝沒于元魏魏置青濟  
膠光北徐州宇文周置齊郡樂安北海郡隋開皇初  
郡廢復為州大業初州廢復為北海高密齊郡琅邪  
東萊五郡唐武德初郡廢為青齊淄維牟密登萊沂  
等州青齊置二總管府後罷總管為都督府貞觀初  
罷都督天寶初復為北海高密濟南淄川東牟東萊

琅邪郡屬河南道青州又升平盧節度石晉青州仍  
為平盧節度齊密二州則為防禦宋置青密齊沂登  
萊維淄八州屬京東東路升青州為鎮海軍密州安  
化軍齊州興德軍元祐三年安化改臨海軍政和元  
年鎮海軍復為齊郡六年以齊州為英宗賜履之地  
升為濟南府建炎元年京東路青州為帥府濟南為  
要郡登萊沂密為次要郡

從李綱所請京輔之外建  
十六帥府時天下之勢已

去干寶所謂非命世雄才不能  
復取綱策雖善豈高宗能辦哉

金人初入中原特立



宋濟南知府劉豫為齊帝兼八州之地八年廢之置

益都濟南二府立山東東路統軍司于益都轄十三

州焉

維淄密莒寧海登萊沂海濱棣清滄

國初以濟南益都立二帥府

益都仍行省事後並廢置益都濟南般陽三路總管

府割德州寧海為隸省之州四分齊境立宣慰司于

益都以鎮之廉訪司于濟南以按治之屬山東東西

道皆古全齊之地也其詳則各隨郡縣以載焉其舊

屬齊邑今割入他郡者亦別附見云

分野

地志曰虛危為齊分星曰玄枵宮曰寶餅時曰子州  
曰青魏陳卓分郡國所入宿度齊國入虛六度北海  
入虛九度濟南入危一度樂安入危四度東萊入危  
九度平原入危十一度淄川入危十四度魯分徐州  
屬齊者東海入奎一度琅邪入奎六度高密入婁一  
度城陽入婁九度膠東入胃一度又唐一行山河兩  
界圖曰河為北河江為南河自北河下流南距岱山

為三齊自南河下流北距岱山為鄒魯皆負海之國  
貨殖之所阜也觀兩河之象與雲漢之所終始而分  
野可知矣春秋運斗樞曰虛危之精流為青州分為  
齊國立為萊山其川淮泗其浸沂沭音述又作沭其利蒲  
魚充之浸曰盧維幽之浸曰菑音時藪曰烝養

# 山川

禹貢青州曰嵎夷既略維淄其道徐州曰淮沂其乂  
蒙羽其藝嶧陽孤桐皆今齊境山川也取法于經則

沂山見周禮為青州之鎮故冠諸山濰淄二水青之大川故為衆水之長次則經傳圖志所載與夫古志或遺而高大可稱者皆在所書其餘則畧祠宇古迹之類因山川而互見者不復重出云

益都山

沂山 臨朐縣南百里周禮職方氏青州其山鎮曰沂山註曰沂水所出乃取名也漢志朱虛縣東泰山汶水所出酈道元水經曰大弁山與東泰山連麓沭水

出焉以二水證之即公玉帶

公玉帶濟南人公玉姓帶名玉一音肅見史記

武帝紀註

請漢武所封之東泰山也然漢志謂卑小不稱

其聲者蓋沂山遠望之則高壓羣山緣坡麓疊衍八九十里以漸而升逮至其顛則失其峻極耳又左思齊都賦云神嶽造天惟此山可以當之疑亦因東泰山而得嶽名山頂有二冢相傳周穆王葬宮嬪於此故大峴關因號穆陵云按周初封太公已有南至穆陵之履豈曰穆妃而得名乎蓋二冢不知誰氏之葬

反因穆陵而附會也山半有東鎮東安王廟石刻神像俗傳趙太祖微時閱韓通于此棄衣而石翁媪收之神像猶作臂衣之形故又云翁婆廟本卽沂山之神歷代封祀有典碑志具存而俚俗誕妄如此不經甚矣

大峴山 卽穆陵關也沂山東南曰大弁山大弁今人訛作大屏字相類而誤唐沈亞之沂水雜記又訛作太平山因頂平八九十里故云當從水經作大弁者

是大弁東南即大峴也其山峻狹僅容一軌故為齊  
南天險劉裕伐南燕兵過大峴指天而喜曰彼已入  
吾掌中即此山也山北數里有裕祭天五壇

仰天山 臨朐南七里有黑龍洞縣邑禱雨輒應宋  
碑云元符三年敕額靈澤廟崇寧五年封濟侯

逢山 臨朐西十里按路史逢伯陵姜姓炎帝後太姜  
所出始封于逢在開封逢澤後改封于齊猶稱逢公  
山因名焉有逢公祠漢志云祠逢山石社石鼓於臨

胸山舊有石鼓或擊而有聲則齊亂今不存矣其山四面斗絕惟一徑可登且有泉金末避兵于此者多獲免

靈山 臨胸東北廿里晏子春秋云齊大旱景公曰卜祟在高山廣澤寡人欲祀靈山可乎晏子曰靈山以石為身草木為毛髮天久不雨髮將焦枯身將執獨不欲雨乎祀之何益蓋此山也

九山 臨胸東北三十里大紀云軒轅踐位天下有不



道者從而征之凡五十三征而奄有中區東至于海  
登丸山及岱宗西至崆峒登雞頭南至于江登熊湘  
北逐葷粥合符釜山竹書云堯放丹朱於丹水朱虛  
縣有丹山一名丸山黃帝所禪又名堯山下帶長阪  
曰破車峴東西二丹水出焉此山西接靈山東連方  
山遙見穹崇近則卑小豈上古之時為瀕海之山後  
漸去海遠耳俗名几山蓋丸字訛也

雲門山 府城南五里上方號大雲頂有通穴如門可

容百餘人遠望如懸鏡泉極甘冽崖壁上銜蚌殼結  
石相傳海田所變如沈存中筆談載太行山崖螺蚌  
石子橫亘如帶之類齊地尤多又有碎石子或間瓦  
礫凝結作石殆不可曉蓋蚌石雜沙土凝者水所漬  
也石子自凝成石者氣所化也豈天地之終萬物皆  
碎為塵及其開闢漸復凝聚元氣杳滓中融化未盡  
者猶有其質邪以理逆之無足怪者雲門之東曰劈  
山山峯分裂如劈古名劈頭山西則駝山三山聯翠

障城如畫宋熙寧間知青州盧士宗山路記云營丘東秦舊服周環衆山雲門為之冠然此山實不聞于天下其磨崖題刻有宋慶歷八年富文忠公題名七人熙寧二年歐陽文忠公六人四年趙清獻公二人吳文肅公奎十一人政和五年安撫使梁子美十七人金泰和間亦有益都少尹夾谷璋十一人然則雲門絕景前賢題品尚矣圖經散逸之後乃不得與龍山虎丘角雄天下為可惜也故特表而出之云

堯山 三齊略云在廣固城西十里堯巡狩所登遂以  
為名山頂有祠祠邊有栢樹枯而復生不知年代此  
山正臨廣固廢城才二三里去今府城乃十里耳唐  
開元三年青州刺史王昕碑亦云堯山者齊記謂堯  
巡狩所登大歷八年平盧淄青節度使李正己碑云  
魏神龜三年青州牧臣沐載建祠及李乾暉碑陰疏  
棟宇甚盛今皆不存中統初益都同知劉仁傑始立  
廟設像紀石又有宋熙寧小碣凡五碑余按堯狩此

山殊不經見府東角崩山與方山相連伏琛齊記亦名堯山水名堯水地名堯溝以堯名者不一鄭康成云堯遊城陽而死葬焉大紀云堯葬城陽丘壠小葬具微前志謂濟陰成陽有堯冢然齊有丹山朱虛丹朱所封而齊之城陽比濟陰尤顯豈堯老而遊者齊宮之城陽歟丘壠微小不存而山川猶表其稱歟

嶼山 府城東五十里水經云康浪水出嶼山堯水逕嶼山東山在劇縣西南無事樹木圓峭孤特左思賦

嶼鎮其左是也按齊城山勢俱帶西南東郊平原百餘里有香山者童然孤峙康浪發其南堯水逕其東即嶼山也元和志作箕山紀侯冢在山陰宋書云焦恭祭冢得玉磬焉今見巨洋水條下山西南十里有龍女泉辛酉夏旱欽禱此泉投文水中即日雨霑足明年復禱亦如之嘗率村氓欲碑其事氓諾而不集因附此以垂不朽云

牛山 臨淄南十里孟子曰牛山之木嘗美矣齊景公

登牛山北顧其國而流涕為晏子所笑即此山也又  
白淵之齊道記曰黃丘北十里有鸞鷺峴下帶長澗  
東北流經牛山山去此水八十餘里號曰牛頭水是  
齊景公所登而歎處蓋言為山濁水耳

嶺山 臨淄南十五里齊風曰子之還兮遭我乎嶺之  
間兮即此山也漢書作嶺亦作嶺與嶺通

稷山 臨淄西南十三里隋志曰臨淄有稷山齊記補  
曰山舊有后稷祠故名又齊宣王嘗立孔子廟亦名

孔父山也

愚山 臨淄西二十里桑欽云山東有愚公冢山北有  
愚公谷按韓非子云桓公逐鹿入谷問一老父此何  
名愚公谷對曰臣畜牝牛生犢賣之而買駒少年謂  
牛不能生馬遂持駒去傍鄰聞之以臣為愚故名愚  
公谷後人因為立廟宋元豐間禱澍有感封隱利侯  
南曰杜山與愚山連阜水經云時水屈而西南有杜  
山高士傳齊宣王獵於杜山問丘先生長老十三人



相與勞王王賜父老不祖父老皆謝先生獨不拜復  
賜無徭役又不拜曰望得壽富貴於王王曰死生有  
命非寡人也倉廩備災無以富先生大官無闕無以  
貴先生問丘曰非也選良吏平法度臣得壽矣賑乏  
以時臣得富矣令少敬長臣得貴矣山有白龍灣神  
祠宋政和賜額顯貺

商山 臨淄西三十里今隸高苑齊記補云南燕建平  
三年立冶逮今鼓鑄不絕崔琰述征賦云涉淄水過

相都登鐵山望齊密即此山也寰宇記以為密州之  
鐵山者非是

孤山 濰州西四十里有穴曰龍洞禱焉雲出即雨宋

封山神曰廣靈侯又以孟子言伯夷避紂居此北海

之濱因立廟封伯夷清惠侯叔齊仁惠侯崇寧大觀

碑刻存焉國朝至元十八年加封山神曰孚澤廣靈

侯伯夷昭義清惠公叔齊崇讓仁惠公

路史伯夷名允字公信叔

齊名致字公遠夷齊謚也此說恐未必然

山東曰麓臺俗傳公孫弘讀書

處元和志以為弘墓

陸山 昌邑縣南四十里維水東岸漢封霍光為博陸侯食邑北海河東師古曰蓋鄉聚之名非縣也此博陸聚之山耳故名陸山天寶六年敕改霍侯山南有岵山又南峽山皆瀕維水

浮來山 莒州西三十里春秋公及莒人盟于浮來即此也俗訛作浮丘山山半有莒子陵又東南馬鬣山又東屋漏山浮來之北則洛山黃華水發源于此合

浮來衆水瀦為莒之西湖湖西復有定林山山有定林寺亦名刹也

焦原山 莒州南四十里記云莒有焦原臨百仞之溪人莫敢近莒勇士登焉莊子伯昏瞀人射臨百仞之淵即此漢志謂之崢嶸谷俗曰青泥街兩峽峻立如街故云

電山 沂水縣西北三十里寰宇記山出紫石英好者暎徹如電故名亦作岫山今曰岫突固又東北螳螂

山與大小二魯山相連有穴如門直入二十里真仙境也縣西四十里有磨石峴長二十餘里極險峻峴下即堂阜鮑叔解管仲囚處俗訛作憚阜

高柘山 沂水東北百里漢志靈門有高柘山浯水所出東入淮又名巨平山俗曰臺頭山

望仙山 沂水西南百里縣中有望仙橋以為王喬飛

鳥之地未詳

按列仙傳仙人王喬同姓名者有三人吹笙王子晉一名王喬在周飛鳥王喬

在葉縣食肉芝王喬在益州北平山在齊地琅邪者無之俗附會耳

蒙陰山 蒙陰縣南八里今名仙洞山琅邪承宮避亂

此山立性好仁不與物競人有認其禾者舍之而去

龜蒙二山 魯頌閼宮曰奄有龜蒙遂荒大東傳曰龜

蒙魯國二山也龜山近魯在今費縣西北七十里後

人指為蒙山者山頂宛如龜形名不虛得夫子龜山

操曰余欲望魯兮龜山蔽之韓退之擬曰龜之大兮

祇以奄魯則龜為魯之大山明矣蒙山者在龜山東

二山連屬長八十里禹貢之蒙羽論語之東蒙此正

蒙山也邢昺曰先王封顓臾為附庸之君使主祭蒙山蒙山在東故曰東蒙後人疑於東蒙之說遂誤以龜山當蒙山蒙山為東蒙而隱沒龜山之本名夫魯人頌其本國之山川辭必審矣故今定蒙山為龜山東蒙為蒙山以復古焉

帝王世紀少昊自窮桑都曲阜註謂窮桑在東蒙山屬魯

地然未知果是否

龜山下有古顓臾城山前王虛宮唐仙人

賈神翁所建有英烈昭濟惠民王祠即顓臾也山西南十餘里有漏澤澤有五穴春夏積水秋冬漏竭將

漏之時先有聲居人扈穴取魚隨種麥比水至麥已

收矣

費縣解有唐大中間校書郎李潛漏澤賦并序  
石刻宋至和間出於泥中今斷裂為二在醉翁

亭記碑傍醉翁碑者歐公同時人蘇唐卿為費縣  
宰篆記文刻石立於此并刻歐公往復手帖皆精蒙

山前陽口村有玉皇廟相傳老萊子故宅也陽口亦

山名後魏費縣理此高士傳老萊子隱蒙山著書十

五篇言道家之用楚王嘗至其門其妻挾薪而至怪

車馬跡之多曰可食以酒肉者可加以鞭捶可受以

官祿者可隨以鈇鉞先生受人官祿為人所制妾不



能為人所制也夫婦遂相與逃去

路史又云老萊子即老子邑于苦之

賴賴乃菜也孔子至楚見老萊子時已二百餘歲斑衣戲母側所問答皆禮事知非二人未知是否

羽山 地記舊在朐山縣西北九十里今屬沂州東南

百二十里殛鯀山也前有羽潭一名羽池左傳鯀化

為黃能入于羽淵即此淵傍生細柳野獸不敢踐郡

國志又云鍾離昧城南有羽泉亦殛鯀處其水恒清

牛羊不飲

艾山 左傳隱六年公會齊侯盟于艾杜註泰山牟縣

東南有艾山在今沂州城西三十里與大小鳳凰山相近官溝水自小沂分流經艾山西注山前靈鎮侯廟山東漢厚丘縣古城城西有酺神廟詳見祠宇

君山 一名抱犢山嶧州北六十里述征記曰承縣君山有抱犢固壁立千仞去海三百里天氣澄明宛然在目山上有池深纔數尺水旱不增減平田數頃昔有隱者王老抱一犢於上耕種後遇異人仙去故以名焉漢曰樓山魏號仙臺其高九里周四十五里然

今嶧州城北三里別有仙壇山亦奇秀豈即仙臺而誤為君山所掩邪

魯卿山 嶧州東北七十里國語季文子相宣成二君妾不衣帛馬不食粟魯人思其遺惠為之立廟亦名季山俗作神峯山

夾山 嶧州北七十里通典東海懷仁縣有夾山春秋之夾谷也左傳定十年公會齊侯于祝其實夾谷孔子相漢有祝其縣

禹貢別州以山川定經界秦漢以降建置雖不常亦不敢失山川之限焉按抱犢魯卿諸山古圖經皆屬嶧州今則並屬沂州訪之耆舊云李壇據齊以其姻親胡某者知沂州實張威福嶧州畏其逼盡割州東二十里外境與之逮今不改嗚呼壇賊據彈丸之地為政不平如此固不足責職方氏因之豈矇不知邪

尼丘山 滕州鄒縣東北六十里有坤靈洞宣聖廟其東顏母山水經謂之防山防墓崩即此有顏母廟南

有昌平山夫子所生之鄉又南馬鞍山有孟母墓又南唐口山有孟子墓

鳧山 鄒縣西南五十里閔宮曰保有鳧嶧遂荒徐宅傳曰鳧嶧二山名也古有伏羲廟今云有伏羲墓按左傳顓臾風姓伏羲之後實司太昊之祀鄒魯有廟是也伏羲都陳有墓非也今訛作爺娘山

嶧山 鄒縣東南二十里京相璠曰嶧山在鄒縣繹邑之所依山東西二十里高秀獨出積石相臨殆無土

壤石間孔穴洞達相通有如數間屋者俗謂之嶧孔  
避亂入嶧外寇雖衆無所施害永嘉之亂太尉郗鑒  
將鄉曲千餘家逃此今山南有大嶧名郗公嶧亦有  
古城遺跡史記始皇二十八年東行郡縣上鄒嶧山  
刻石頌德三代地理書曰始皇乘羊車登嶧山刻石  
處名曰書門

桃山 滕州南五十里御覽云即華采山也又名義珠  
山山上有井不可窺窺者不盈歲輒死有鳥巢井上

金喙黑色見則大水今訛作陶山謂有陶朱墓西微  
山謂有微子墓皆謬惟奚公山奚仲造車處上山軌  
轍猶存見地記云

牟婁山 密州安丘南二十里路史云古有巢氏治石  
樓山即牟婁也牟牟夷國密之諸城有婁鄉隋因置  
牟山縣今訛作朦朧按字書云牟婁微視也義或緣  
此

常山 密州南二十里東坡雩泉記曰禱雨未嘗不應

蓋有常德者故謂之常山廟西南十餘步有泉古者謂吁嗟而求雨曰雩名之曰雩泉宣和間封山神靈

濟昭應王

廬山 密州東南四十五里東坡詩註廬教秦博士避難此山遂得道有廬教洞飲酒臺聖燈巖障日峯三泉

馬耳山 密州西南六十里東坡詩試掃北臺看馬耳

未隨埋沒有雙尖

北臺謂超然臺也



九仙山 密州東南百二十里坡云九仙在東武奇秀

不減鴈蕩所謂九仙今已壓京東是也

漢琅邪郡有太一仙人祠

九所豈以此得名邪

琅邪山 密州東南百五十里齊景公放於琅邪即此

吳越春秋越王句踐徙琅邪立觀臺以望東海秦始皇

皇廿八年南登琅邪大樂之留三月徙黔首三萬戶

于臺下立石頌德御覽云碑有六百字可讀臺側有

四時祠臺上有神泉人或汚之即竭漢於此置琅邪

縣武帝亦嘗登焉隋開皇十六年於此置豐泉縣大業初復為琅邪唐省之今山下井邑遺跡猶存登山石道如故土人名曰御路

大朱山 膠州西南百二十里岸海名山也通典高密諸城縣有古齊長城自大朱山起蓋古齊長城起自齊西防門東逾泰山穆陵至大朱山海濱而絕非起自大朱也大朱山有石室晉永嘉中陳仲舉隱此得道仙去旁有小朱山錯水所出又東徐山方士徐福

將童男女二千人會此入海采藥不返又東白狍山

風水所出

錯水風水俱東入海

大小二勞山 卽墨東南六十里岸海名山也又名勞  
盛山四極明科云軒皇一登勞盛山是也齊記云泰  
山自言高不如東海勞吳王夫差登之得靈寶度人  
經神仙傳樂子長遇仙人授以巨勝赤散方曰蛇服  
此藥化為龍人服此藥老成童子長服之年百八十  
歲顏如少女登勞山仙去山高十五里周八十里此

大勞也與小勞山華樓山

疑即陰山

鼎足相聯大勞山有

上清宮五代末華蓋仙人識趙太祖于側微宋人為  
建此宮近世有劉使臣者棄金符遯此山其徒建碧  
落宮

陰山 即墨東南八十里上有小池深不盈尺水旱不

增減池傍有石人并石馬蹄迹寰宇記云秦始皇至  
牢盛山望蓬萊立馬此山遣石人驅牢山不動因立  
於此石人今海濱山上往往有之

蓋勞山之高以其  
登陟之難則名勞

驅之不動  
又名牢也

不期山 即墨東南四十里又名訓虎山後漢童恢為  
不期令有虎食人恢檻獲二虎訓之曰王法殺人者  
死虎敢食人一虎垂頭服罪一虎吼躍不服服者殺  
之躍者縱之三齊記云鄭玄教授此山草生如籬長  
尺餘堅韌異常號康成書帶余按勞山不期皆康成  
講學之地文澤涵濡草木為之秀異千載之下第茅  
塞焉深可歎已

天井山 即墨東十餘里上有一井極甘因號天井北  
二十餘里平地三穴湯泉出焉若有風從西北來則  
湯極熱不可入

女姑山 即墨西南三十里山北舊有基漢志不期太  
一仙人祠九所及明堂武帝所起不期城西南有七  
神號曰女姑即此又東有中祠山亦九祠之一又天  
室山亦祠所竝見寰宇記

田橫島 即墨東北百里橫衆五百人死此四面環海

去岸二十五里可居千餘處蓋有竹島塔沙福島穀  
積車牛皆海中島名然登州蓬萊閣西復有田橫島  
在岸不在水非是

### 寧海山

大崑崙山 州東南四十里嵎夷岸海名山也秀拔為  
羣山之冠仙經云姑餘山麻姑於此修道上昇餘趾  
猶存因名姑餘後世以姑餘崑崙聲相類而訛為崑  
崙然今東夷人止名崑崙又有小崑崙與之相連宋

政和六年封仙姑虛妙真人重和元年賜號顯異觀  
元遺山續夷堅志崑崙山石落村劉氏嘗於海濱得  
百丈巨魚取骨為梁構屋曰鯉堂堂前一槐蔭蔽數  
畝忽夢女冠自稱麻姑乞此樹修廟劉湧許之後數  
日風雷大作昏晦如夜失槐所在相與求之麻姑廟  
中樹已卧廟前矣山有東牟侯神祠又金大定間關  
西王祖師訪山前大姓于氏曰我前生修煉此山山  
有烟霞洞盍往登焉于氏以為我世居此未聞有洞



相與登山求之果見洞口有烟霞字跡大為神異建祠紀石焉

廬山 州東二十里與大峴山東牟山相連北至海百里有望海臺峴山有東牟侯祠又東繫馬山始皇於此繫馬草生猶作繫結之狀俗云繫馬砮州西南六十里兩欹山兩峯欹側相倚竝見寰宇記

文登山 文登縣東二里寰宇記始皇東巡召集文人登此山論功頌德故名又東有鵠鷗山常有鵠鷗栖

其上

斥山 文登東南六十里爾雅云東北之美有斥山之  
文皮焉蓋以海濱廣斥得名高門之族居此有千餘  
家東齊于氏皆斥山望也欽之曾大父端叔府君自  
斥山徙昌陽大父君瑞府君其仲子也又自昌陽徙  
益都先考禮部公嘗命欽攷斥山于氏所出欽對曰  
按氏族略于氏本周武王子邾叔所封之國在河內  
邾城子孫以國為氏去邑為于後魏時有自東海隨

拓拔徙代改為萬紐于孝文復為于氏又有淳于姜  
姓之後唐避憲宗嫌名亦為于氏此鄭氏之說也然  
史記文王伐邠在野王縣西北書大傳正作于于蓋古諸侯  
之國非始於邠叔也又夏相時于夷來賓子欲居九  
夷于夷其一也或即嵎夷之轉或于國之裔有奔海  
濱而君長東夷者何其族之蕃而世之衍也斥山之  
于祖此為的先君領之

之界山 州西北五十里海濱史記秦始皇廿九年登

之罘刊石紀功三十七年又自琅邪使徐福采藥福  
言苦大魚為患於是連舟下海登之罘射巨魚郊祀  
志齊有八祠之罘為陽主山有陽主廟武帝太始三  
年幸琅邪禮日成山登之罘稱萬歲子虛賦又云射  
乎之罘其山入海中有壘石相傳武帝造橋兩石銘  
猶存山高九里周五十里西南至福山縣長三十餘  
里

召石山 文登之東三齊略云始皇造石橋渡海觀日

出處有神人召石下城陽一十山岌岌相隨而行石  
去不駛神人鞭之見血今召石山石色皆赤伏琛齊  
記曰始皇造橋觀日海神為之驅石豎柱始皇感其  
惠求與相見神曰我醜莫圖我形當與帝會始皇從  
橋入海四十里與神相見左右有巧者潛以足畫神  
形神怒曰帝負約可速去始皇轉馬前腳纔立後脚  
隨崩僅得登岸今驗成山東入海道水中有豎石往  
往相望似橋柱之狀又有柱石二乍出乍沒琛云始

皇渡海立此石標之以為記山下有海神廟望海臺  
始皇廟

成山 文登東北百五十里古不夜城側漢志亦作盛  
山主祠曰盛山斗入海最居齊東北陽以迎日出武  
帝太始三年幸東海作朱鴈之歌禮曰此山還而下  
卹鰥寡今按召石與成山相近因始皇會海神故後  
世遂呼成山曰神山斗入海旁多椒島海艘經此  
失風多覆海道極險處也

鐵官山 文登西百四十里去年平城百里漢置鐵官  
冶鑄遺跡尚存

五壘山 文登南五十里南北成行入海如壘又南石  
門山兩石聳立如門今按文登正南有鐵查山東連  
斥山甚奇秀圖經弗載豈古與斥山為一或即五壘  
石門之異稱歟

白鹿山 文登北四十里唐神龍三年刺史畢元愷於  
此獲白鹿進之故名又東北海邊有雞鳴島北海中

有海牛島郡國志云海牛無角長丈餘紫色足似龜  
尾若鮎魚性捷疾見人則飛赴水皮堪弓韃脂可然  
燈與海驢島相近海驢常以八九月上島產乳其皮  
水不能潤可以禦雨竝見寰宇記海驢皮今有獲之  
者淺毛灰白作鱸魚斑又有海狸亦上牛島產乳見  
齊記

昌山 文登西南四十里有巨神龍龍祠昌水出此山  
因氏焉南合黑水北納昌陽湯通名昌水西南過萊



陽會五龍水南入于海昌陽湯極清溫在文登西七  
里名如意湯圖記文登有溫泉七所此為最

般陽山

九目山 登州東南七十里齊記云山有九竅故名  
北二十里有龍山又北羽山之泉水所出東北流合石  
門水入海寰宇記亦謂此為殛鯨之山非也東海既  
有羽山鯨廟矣此偶同名耳又有朱高密神隱丘歷  
堂等山圖志弗載不可備述

沙門島

附海市

登州北海中九十里上置巡檢司海艘

南來轉帆入渤海者皆望此島以為表誌其相聯屬則有鼉磯島牽牛島大竹島小竹島歷歷海中蒼秀如畫海市現滅常在五島之上海市之名始見江鄰幾雜志東坡詩序或謂類南海蜃樓蛟蜃噓氣所成殆不然欽嘗至登州海上訪之蓋海市常以春夏晴和之時杲日初升東風微作雲脚齊敷于海島之上海市必現現則山林城闕樓觀旌幢輶車駝馬衣冠

人物凡世間所有象類萬殊或小或大或暫或久或  
變現終日或際海皆滿其為靈怪赫奕豈蜃樓可擬  
哉蓋滄溟與元氣呼吸神龍變化浩不可測如佛經  
所謂龍王能興種種雷電雲雨居於本宮不動不搖  
山海幽深容有此理欽以中秋後至海濱天已微寒  
知州事李述之詩人也亦相與禱于廣德王之祠越  
二日忽報云今晨風色雲氣海市當現同登賓日樓  
候之日初出大竹島上橫一巨艘長餘百尋述之指

以示余余曰此海舟耳述之曰諦觀之何故不動須  
更前後曳數旗劒戟紛紜忽不見惟有空舟漸變如  
長廊而滅述之曰風稍急而寒不然現未已也嗚呼  
神哉然則史漢所稱三神山蓬萊方丈瀛洲望之如  
雲未能至者殆此類耳且秦漢入海方士僅能往來  
於磯島之間偶見此異慕之為仙亦不為過非若今  
人航海遠泛黑水洋外或飄蕩歲月而後返果有蓬  
萊仙山何不聞也斯言足破千古之惑矣

金山 亦名岨嵎山棲霞縣東北二十里以產金得名  
即地記萊陽縣之黃銀坑也隋開皇十八年年州刺史  
辛公義於此坑冶鑄得黃銀獻之山寺有隋碑淘  
金者所祖然隋唐以來皆守土官采以充貢為數不  
多未見其害今則編戶置官歲定金額有增無減三  
時沙汰僅得分毫名曰淘金實則買金鑄納戶漸逃  
亾官復侵剥大約金戶一家之賦當他戶三倍之多  
而戶不勝其苦矣又指以金苗鑿地人家居宅墳隴

皆所不免而民不勝擾矣其害視騷竈有加夫弘羊之罪良史已書辛公義作俑此毒可無誅乎故論及之土俗訛傳隋開皇中岨嵎山出黃金九屋俗儒便紀之于石為可笑也

艾山 棲霞西北三十里山前溫泉可浴按棲霞縣本以山得名曰百澗北曲方嶺唐山靈峯覆甌積金芝

陽公山碁山磁山峪爐山

峪爐在山縣南

不能具述大抵

環縣皆山耳宋李常云吾州有重巖疊嶂不可名狀

信然

萊山 黃縣西南五十里封禪書云齊八祠萊山為月主山有月主真君祠一云萊陰山多仙聖所居

蹲狗山 黃縣西南三十里上有石如狗蹲伏氏云山極靈劉寵微時途經此石犬吠之後為太尉俗名狗兒山

蘆山 黃縣南四十里山下有真君宮金縣尹陳公碑云蘆童子晉時人九歲居此山食茯苓升仙唐封沖

禧真君

三山 萊州北二十里漢志秦祠八神四曰陰主祠三  
山衆宇記云在掖縣北海之南岸顏監謂即三神山  
者非也漢志曰蓬萊方丈瀛洲此三神山者其傳在  
渤海中則三神乃蓬萊方丈瀛洲之總稱豈海岸之  
三山也詳見海市論

浮游島

萊州北海中望若浮游然俗訛曰芙蓉

福祿山

萊州西五里出溫石可為器又有金山馬鞍



優游雄山土山君山皆縣境內

萬里沙 萊州北三十里夾萬歲水兩岸沙長三百里  
路史云雲陽氏陽帝處于沙掖有萬里沙祠秦皇漢  
武皆禱于此又北十餘里臨海有蠡石方圓五步上  
有窪樽古老相傳始皇鑿此盛酒以祭百神

大基山 萊州東十里金明昌間劉國樞記云大基山  
道士谷後魏鄭文公得道之地流泉花竹地占高敞  
略無纖塵郡之甲勝

七子山 萊陽縣東南九十里山有八峯大峯居中餘  
若子然故曰七子

五龍山 萊陽南二十里四水自西北昌水自東北皆  
南流至山前五水相合名曰五龍南入于海山因名  
焉西有荆山寰宇記作茝山爾雅霍山茝者是也

高麗山 萊陽西南九十里司馬懿征遼東置戍於此  
以高麗為名俗訛作差戕山

火山 萊陽北三十里山多赤石故以火名已上竝見

寰宇記又有倉山林寺福阜三山

林寺福阜  
淘金之地

又有獅

子峯俗傳金人詩今已佚

大豁山 膠水縣西北二十里伏琛云虞鄉城東南有  
豁口曰大豁山北又有小豁山

嶺岬山 膠水北三十里寰宇記云川形嶺岬故名北  
與蹲狗山相接天柱大澤皆一帶山也

明堂山 膠水東北四十餘里齊記云盧鄉城東三十  
里有明堂山與巨青山連出烏頭天雄又云藥石水

出此合石瀆水北入于海

墨山 膠水東北六十里石色如墨故名水出茲山亦名墨水

金泉山 膠水東南四十里記云出桔梗防風

鳳喙山 招遠縣北三十里本名牛心至元六年陳節齋按部過之以其名俚故易之有詩石刻在縣治縣北五里有湯泉阜泉出阜南極熱東流合冷泉入池始可浴鳳喙山東有山中空俗曰虛空山又有齊山

望兒亦皆鄙俚自圖經散逸齊地山川例蒙俗惡之  
稱惟密州境內一山一水名存古雅蓋得坡仙手滌  
凡陋千載有光信賢人之澤遠矣

梓桐山 般陽府城東十餘里後有石壘園洞古老相

傳鬼谷子隱居名鬼谷洞

典略鬼谷弟子蘇秦張儀輩五百餘人鬼谷為作窟

深二丈曰有能在窟中說使泣者則能分人主之地矣秦下說之鬼谷泣下即此洞亦有鄭康

成廟金末燬于兵乙卯歲淄川令張孚重修澗水燕  
談云處士王樵隱此山詳見人物論梓桐東曰吉磨

山出磨石有石碌井

原山 府東南七十里地志云原山溜水所出今名岳陽山溜出其陰汶出其陽非止一水也山亦跨溜川益都兩縣界云

甲山 府西南三十里水經註萌水出般陽西南甲山東北入瀧水今訛作夾谷山謂是齊魯會盟之地非也當從水經

巒山 府北十里三齊略云鄭玄刊註詩書棲遲此山

上有古井獨生細草葉似薤俗謂鄭公書帶即今鬻  
堂嶺與長白山相連元遺山濟南行記謂因范文正  
公學舍在焉故謂之鬻堂蓋未見古圖經耳

長白山 長山縣南三十里太平御覽云長白山者因  
此山雲雨長白故名之西南又有大湖山二山竝有  
石室敗漆船上有記皆謂堯時物元和志云於陵城  
西長白山高二千九百丈周六十里昔陳仲子夫妻  
隱此山阿有醴泉寺相傳志公卓錫之地宋范文正

公讀書寺中日惟一粥偶見窖銀覆之而不取後為  
西帥僧人求為修寺公使發之取窖中銀適周於用  
此與還術者子白銀相類世或未之聞也上下二書  
堂在黌堂嶺會仙峯下皆宋代所建遺跡尚存今即  
寺內有范公祠舊說公母嫁齊居秋口公讀書此山  
相去百里往來省親劬甚後知青州悲思不自勝秋  
口在今顏神鎮土人亦名其處為范公書堂按南岱  
東沂山小泰之外沂之蒙山密之九仙即墨之大小勞



寧海之姑餘般陽之長白皆三齊高大名山也餘不得並列

濟南山

歷山 府南五里一名舜耕山古有舜祠曾南豐齊州三堂記云舜耕歷山漁雷澤陶河濱作什器於壽丘就時於負夏鄭康成釋歷山在河東雷澤在濟陰負夏在衛地皇甫謐釋壽丘在魯東門之北河濱在濟陰定陶西南陶丘亭是也以余考之耕稼陶漁皆舜之

初宜同時則其地不宜相遠孟子又謂舜東夷之人  
二家所釋雷澤河濱壽丘負夏皆在魯衛之間東方  
之地歷山不宜獨在河東在齊者是也世因河東雷  
首山一號歷山為水所出舜娶堯女所居遷就附益  
謂歷山為雷首之別號不考其實由是言之則圖記  
皆謂齊之南山為歷山舜所耕處故其城名歷城為  
信然也或者不此之論乃備載陸魯望象耕鳥耘之  
辯可見其贅

龜蒙曰世謂舜田歷山象為之耕鳥為  
之耘聖德感召非也蓋耕者行端而履

深似象步松者舉疾而畏晚如鳥啄

通典云山有太甲冢未詳歷山南

屬泰山東連琅邪崇岡疊嶂脊脈不斷欽嘗有詩云  
濟南山水天下無晴雲曉日開畫圖羣山尾岱東走  
奏音海鵲華落星青照湖此濟南山勢也

廟山 府城東南十里三齊記云因舜廟得名遺山濟  
南行記作妙山非是

函山 府南二十里按酉陽雜俎云齊郡函山有鳥名  
王母使者漢武登此山得王函帝下山王函化為白

鳥飛去世傳山上有王母藥函鳥常守之因號函山  
有九十谷又名卧佛山

奎山 府城西南十五里三齊記奎山公神似猪頭戴  
珠冠殷時有道士隱此野火四發道士祈天即雨今  
人遇旱燒山禱雨多應又北有匡山世傳太白讀書  
于此又北曰栗山曰藥山山出陽起石極佳故名

華不注山 府東北十五里左傳成公二年魯季孫行  
父帥師會晉郤克及齊頃公戰于鞏齊師敗績逐之

三周華不注又云從齊師至于靡笄之下逢丑父與

公易位使公下如華泉取飲則此山亦名靡笄

靡與  
摩同

地記又名金輿道元謂單椒秀澤不連陵以自高虎  
牙傑立孤峯特拔以刺天青崖翠發望同點黛信然  
山前道院中有石刻太白諸賢詩院前即華泉水與  
小清合流

鵲山 府北二十里王繪太白詩註云扁鵲煉丹於此  
俗又謂每歲七八月烏鵲翔集故名按扁鵲盧人近

在今長清縣地煉丹此山者是

古有鵲山院  
見陳後山詩

黃山 府西南六十里山周如城岱陰諸谷之水奔流  
至山西匯為池圍數畝不溢而伏山即渴馬崖也伏  
流至府城之西而出即趵突泉也

西龍洞山 府南六十里道玄云符秦時有竺僧朗事  
佛圖澄碩學淵通與隱士張巨和居此因號朗公谷  
今有朗公寺亦三齊名刹歷代有碑谷有琨孺溪水  
過玉符山又名玉水至祝柯入濟今溪水東西分流

山中人云西發趵突東發百脈驗之信然謂徑入濟

者誤也龍洞西南有方山

長清縣界

疑即水經之玉符山

又西隔馬山

長清東南

左傳襄公十八年晉伐齊齊侯禦

諸平陰塹防門而守之廣里齊師懼夜遁風沙衛連

大車以塞隧而殿殖綽郭最曰子殿國師齊之辱也

子姑先乎乃代之殿衛怨二子遂殺馬於隘以塞道

欲使晉師得之即此後人呼為隔馬山山東北曰神

林有隔馬神君祠祠南有一潭清澈見毫髮歲旱邑

人祈聖水禱雨輒應唐宋碑刻存焉又南青崖山金

亂嚴侯率義兵保此

皆古齊山  
今屬泰安

東龍洞山

府東南三十里山如重甌

音言甌也爾雅  
重甌隤此山類

之西洞透深一里許秉火可入東洞在萬仞絕壁之

上洞口釜鬲尚存煙火之跡如墨蓋昔人避兵引絙

以上中必有泉不知其深幾許耳有翠屏巖獨秀峯

三秀峯峯側龍祠郡邑禱雨極應宋封靈虛公九域

志又云禹登山謂禹治水嘗登



龍盤山 章丘縣南二十八里齊記云周初有神龍潛  
此山遂名有神跡祠姜嫄所履伏琛云宋濟南太守  
蕭承之立祠山上其妻亦學履而產齊帝按姜嫄炎  
帝後有駘氏之女高辛世妃后稷母也駘舜封稷作  
邠元和志邠在京兆武功縣路史駘在費縣南遠者  
去此數千里近亦五百餘里姜嫄未嫁不應至此既  
嫁則高辛都亳河南偃師地豈在齊乎伏琛之論尤  
覺誕妄

樂盤山 章丘南二十七里齊記云下有樂盤城即平陵王與章丘侯餞送之地

東陵山 章丘南二十八里龍盤山相連寰宇記云盜跖死處山南有盜跖冢

危山 章丘東北五里寰宇記云漢文帝十六年封齊悼惠王子為齊孝王景帝三年孝王與吳楚通謀自殺葬於此墓在山椒

女郎山 章丘東南七里又號小田山齊記云章亥有

三女溺死葬此有三陽洞俗云有子張墓即章女冢  
所謂章丘者耳

雞山 章丘西南四十里齊記云有神雞晨鳴于此候  
之獲一石潔白如玉因以名焉巨合水出此山下俗  
名雙女泉

湖山 章丘正南五十里明秀鄉相傳古有仙翁仙婆  
修道此山皆得壽考今有公婆廟遇旱禱雨即應

亭山 章丘西南六十里桀死處湯放桀于南巢書傳

皆謂今廬江巢縣獨尸子云放之歷山豈古有巢氏  
治琅邪之石婁山齊地亦有南巢邪又桀死後其子  
淳維妻其衆妾遁于北野隨畜轉徙號曰葷育若桀  
死南方其子豈能北遁自齊奔漠則易矣隋唐有亭  
山縣見古蹟

啞婦山 鄒平縣西十三里俗呼啞婦山謂天子去齊  
道此山婦人陽瘡以滅跡蓋因孔子去魯之歌曰彼  
婦之口可以出走而附會此名直野語耳

大山 無棣縣東北八十里

小山 無棣西北一百二十里二山圖經弗載然濱棣  
瀕海廣斥無高峻之山故志

平原嶺 德州東南七十里有望遠臺壽公菴嶺上鹿  
角關



齊乘卷一

欽定四庫全書

史部  
齊乘卷二

詳校官編修

臣曹振鏞

檢討

臣

德生覆勘

總校官檢討

臣何思鈞

校對官監丞

臣張曾炳

謄錄監生

臣王思謐

欽定四庫全書

齊乘卷二

元 于欽 撰

益都水

維水 水經云出琅邪箕縣維山許慎吕忱云箕屋山

淮南子云覆舟山廣異名耳實一山也

今清風山

在莒州

莒縣北百里漢箕侯國地東北流逕仲固山折泉水  
入焉折泉出松山漢有折泉縣又東北逕密州城西  
折而北涓水合扶淇水入焉涓水出馬耳山扶淇出



常山竝見水經今名李齊河又北盧水入焉盧一名

久台

音怡

水出盧山漢橫縣之故山也

道元謂盧水側有不灰木野火

燒死炭不滅

又東北至巳山密水入焉密又名百尺有二

源一出障日山東坡所謂小峨嵋者一出五弩山

今作

鹵山又東北浯水入焉浯出高柘山

高柘山今名臺頭浯水今名南清河

東北納荆水

三齊記昔人堰浯入荆溉稻田萬頃

荆水出荆山逕平昌

故城臺下合電泉入浯

道元謂雖水過平昌臺下有井與荆水通有龍出入其中

土人謂其城曰城陽城臺曰城陽臺電泉者泉湧如電有龍祠宋封靈霈侯疑卽古龍井

又北逕

龍且冢

冢在淮水東岸五里

淮陰囊沙處也道元謂高密碑在

水西古人堰淮水以溉田散流入夷安潭亦此地

今高

密西有古堤南起岑冢北亘蔡冢長三十餘里謂是岑彭與蔡伯喈冢非也正古堰遺跡土人名曰趙貞女防夷安潭今名都樂古奚養澤也又北逕城陰故城西又北至安丘

東北古淳于城側汶水入焉又東北過昌邑又東北

入于海

漢志淮或作淮故俗亦名淮河

淄水 書傳曰出泰山郡萊蕪縣原山之陰東至博昌

入海按地志水黑為淄

元和志云俗傳禹理水功畢土石黑數里之中波流皆黑

故謂之溜水也

出今益都縣顏神鎮東南二十五里岳陽山

東麓地名泉河古萊蕪地岳陽即原山也東北流逕

萊蕪谷又北逕馬陵俗名長峪道

按此即晉郤克追齊至馬陵賈逵曰

一作馬陵俗以為龐涓之馬陵非是

出峪東流聖水入焉聖水出家桑

谷又曰神泉列仙傳鹿皮公所飲者見水經又東北

逕牛山折而北天齊淵水入焉又北漸

平聲

臨淄東城

又東北逕安平故城北又東北逕樂安縣東古廣饒

地又北入巨淀

今清水泊

又北出注馬車瀆

今高家港

合時水

入海淄多伏流俗謂上下有十八漏按通志略曰杜預謂淄入汶班固謂淄入濟桑欽謂淄入海考其形勢當以杜為正豈其然乎諸說惟桑氏為有據不特此耳宜其以水名家也

時水 通志略曰一名𪔐襄三年齊晉盟于𪔐是也其源岐淺多涸竭又名乾時莊九年公與齊侯戰于乾時是也道元曰時水出齊城西南廿五里平地出泉即如水也水色黑又名黑水今按時水之原南近淄

水詳其地形水脈蓋伏溜所發土人名曰烏河西北  
逕黃山又北逕愚山又屈而逕杜山澗水入焉澗出  
臨淄西南十八里所謂澗中孟子去齊三宿出澗故  
又名宿留水俗謂之泥河又北逕臨淄城北系水入  
焉系出臨淄城西申門即申池水也門側小阜曰包  
山俗又名包河竝城北流分為二俱入時一支逕梧  
臺前西入者曰系水一支遠至博興東南李監橋入  
者曰澗水詳見澗水條時水又北至般陽新城縣東

南索鎮口下可通舟楫又北至博興南地名灣頭灤

水會焉

灤即小清河

又東逕利縣故城

在樂安西

又東逕樂安

縣北又東北由馬車瀆入海水經謂時水自西安城南石羊堰分為二支津西北合黃山之德會水黃阜之南五里泉至梁鄒入濟旱則涸竭此乾時也今不通矣欽嘗自濟南護先妣喪由小清汎舟東下至博興沂時水南上至索鎮而登陸去益都僅九十里耳益都衆水惟此通舟未嘗淺涸焉

澠水 水經註澠水出臨淄縣北世謂之漢湊水逕博  
昌縣南貝丘齊侯田見公子彭生處又西北入時水  
昔晉侯與齊侯宴曰有酒如澠指喻此水也即今臨  
淄西門申池水北流者勢極屈曲俗稱九里十八灣  
過梧臺北小泥河入焉泥河出梧臺下又北至博興  
李監橋入時水此正澠水也魯仲連謂田單黃金橫  
帶騁乎淄澠之間此水與淄東西竝流臨淄介其間  
故齊侯有酒之喻田單馳騁之地淮南子謂淄澠合

流易牙嘗而別之者皆指此水也古諺謂瘦馬不渡  
澠南燕李宣謂澠水不冰良由逼帶京城者乃濁水  
耳詳見濁水條

巨洋水 水經云出朱虛縣東泰山國語謂之具水袁  
宏謂之巨昧王韶以為巨蔑或曰朐瀾或曰沫實一  
水也今謂之泃河出沂山西麓即東泰山也東北流  
至臨朐縣東南熏冶泉入焉熏冶出縣南西溪又北  
沙河出東阜下北來入焉又北至臨朐城東逕覆釜



山又北逕委粟山

水經云孤阜秀出形如委粟今名粟山

又東北石溝

水入焉石溝出逢山東北石澗中

山即石膏山麓三成

水經名

北洋蓋因巨洋在南也又東北龍岡水出臨朐東北

崑山東來入焉又北過益都府城東北建德水合南

陽水入焉建德水出府南七里澗俗名七里河水東

猶有建德村

道元云建德出逢山邳泉出平地今按平地之邳泉在建德水原之東北入建

德非入巨洋也

南陽水見後條又東北康浪水入焉道元云

康浪出劇縣西南嶼山西流西流入巨洋即今香山

南狗王河

三齊略曰康浪水在齊城西南十五里康衢側寧戚扣牛角歌於此今臨淄西南泥

河澶水皆微細且歌云中有鯉魚長尺半此水豈足當之寰宇記又謂康浪水在淄州皆不可信當從水

經云又北逕巨昧店耿弇追張步處又東北逕辟閭渾

墓俗名釣魚臺又東北逕故益縣城古別出一支為

百尺溝

道元謂西北入巨淀者此溝也今廢

又北逕壽光縣東北水經

云舊有孔子問經石室即蒼頡墓也堯水入焉堯一

名澁又名青出府東南七十里角崩山又東北由黑

冢泊入海

黑冢泊述征記謂之烏常泛齊人名湖為泛冢即秦皇望海臺也

余按漢

志石膏山洋水所出東北至廣饒入巨淀即此水也  
但因北洋而誤其原因支津別出而誤云入巨淀曾  
肇南洋橋記乃以洋為南陽非也洋為齊之大川故  
以巨名道元所謂羣書盛言孟堅不應捨大而志小  
南陽水 水經註長沙水出逢山北阜世謂之陽水北  
注濁水通名為陽而有南陽北陽之論

又云逢山即石膏山麓三

成壁立  
直上

余按南陽水出府城西南二十五里石膏山

即逢山之西麓也東北逕廣縣故城西又東北石井

水注之水出劈頭山北流注井積石高深瀑布而下故曰石井亦謂之石子澗即今之瀑水澗也時有通塞南陽水又北而東貫益都南北兩城間西逕表海亭東逕故城陽王廟基古人自廟東竭斷使北注濁水今復東流十五里合建德水入巨洋

北陽水 漢志曰為山濁水所出東北至廣饒入巨淀水經謂之北陽亦謂之澠水出府城西南三十里九

回山

俗名九彪

古廣縣為山也東北逕五龍口又北逕廣

固廢城行於絕澗之底水激而岸峻古諺謂瘦馬不渡李宣謂逼帶京城皆指此也又北逕堯山東至東陽城北又東北逕石槽城又東北逕藏臺又北至樂安東北攏河口合女水

女水見後條

又東北入巨淀 曾肇

南洋橋記曰俗呼洋水有二曰南洋河今橋所在是也曰北洋河距城北二里者是也北洋傳記無文今出九回山入溜水

此水不入溜

在齊記謂之澠水道元則

曰羣書盛言洋水出臨朐陽水導源廣縣兩縣雖鄰

川土不同於事疑焉然則洋分南北當後魏時已不能知況後世哉今辨之曰羣書盛言出臨朐者此巨洋也漢志失其源委耳南陽自為長沙水北陽自為濁水導源廣縣者是也曾氏乃因漢志石膏山之洋水而以陽為洋誤矣蓋石膏山與逢山連麓長沙水

即南陽水

出其西石溝水

即北陽水

出其東洋水自出臨朐沂

山漢志讀如詳與蜀之洋州同音故水經稱洋水則有巨洋北洋稱陽水則有南陽北陽稱南陽者無之

俗所誤矣四水雖以音同致疑源流可攷惜乎曾氏之不察也

天齊淵 漢志曰齊所以為齊以天齊也秦祠八神一曰天主祠天齊天齊淵居臨淄南郊山下五泉竝出南郊山即牛山也按此淵在臨淄東南八里淄水之東女水之西平地出泉廣可半畝土人名曰龍池西南流入淄水牛山在淄水南遙以為志耳蘇林註曰當天中央齊也顏監曰謂其衆神異如天之腹齊齊

記補引晏子曰吾聞江深五里海深十里此淵與天  
齊淵中浮出瓦有天齊字魏永平中水潰出木五北  
齊天保中又出木四皆五采類松柏而香構亭水上  
臨淄俗上已祓楔于此有神祠曰休應之廟余按六  
書故齊本作𡿨亦作𡿨象禾穀之秀齊也引之為整  
齊齊一又為國名借為人之腹齊莊子達生篇曰與  
齊俱入與汨俱出齊者水之旋紋今人謂之旋窠狀  
類腹齊豈淵泉竝出旋流如齊以其祠天稱曰天齊



邪抑天然淵水猶曰齊之天淵云耳且臨淄非天地之中何謂天之腹齊深與天齊尤覺誕妄

女水 水經云出東安平縣蛇頭山又名鼎足山今臨淄東南十五里俗呼二王冢者因山兩墳謂是桓公與其女之冢水出冢側因以名焉然此水通塞不常出則逕石槽城東北入北陽水水經云女水至安平城南伏流十五里然後更注陽水今石槽城

古安平

東

北平地出泉俗名馬臺河至樂安東北獲河口合北

陽水入巨淀土人云此即二王冢水伏流者未知是  
否齊記補引黃石公記云東海龍女隱于此石室尚  
存將還作此水甚有神焉化降則水生政薄則津竭  
述征記亦有此說恐未必然通鑑作汝水南燕汝水  
竭卽此水也

汶水 水經出朱虛縣小泰山今沂山絕頂穆妃陵側  
有瀑布泉懸百丈崖而下卽汶水也東流循鳳凰嶺  
折而北經大峴山陰峴水入焉

穆陵關  
北之水

又北逕蔣峪

口有水出峪中西來入焉

水經有崕山水以爲汶源疑即此水

又北逕

龜山陰

山形如龜臨水

乃折而東逕柴阜

水經注阜南管寧冢阜北邳原冢

又東北逕安丘南阜山

水經註山西孫嵩冢

又東北逕安丘城

西又東北入于淮

水經註古淳于縣淮汶交會處是也

顏監曰前言汶

水出萊蕪入濟今此又言出朱虛入淮將桑欽所說

有異或者有二汶乎余按入濟之汶見禹貢論語之

汶上書傳謂之北汶即今大清河入淮之汶見漢書

入沂之汶見水經濟有三汶清河爲大

述征記泰山郡水皆名汶

有北汶嬴汶柴汶牟汶皆  
源別流同又在三汶之外

丹水 竹書云堯放丹朱於丹水朱虛縣有丹山一名

凡山黃帝所禪又名堯山下帶長阪曰破車峴東西

二丹水出焉記謂丹朱弄兵之所今按西丹出丹山

在臨朐縣東北三十里東丹出方山在丹山東北

寰宇

記丹山角崩方山遠望正方

二水皆北流至昌樂廢城西北乃相

合通名為丹河北入于海

寰宇記丹水入昌樂縣界引以溉田今按齊地衆水

可引溉者極多古人陂渠遺迹猶有存者自宋時至于今民俗偷惰為政者何慮及此然則史令所譏豈

特西門  
豹也哉

白狼水 水經註出丹山逕北海郡城東入別畫湖亦

曰朕懷湖東北入海余按白狼有二源一出丹山

隋志

作白狼山

一出北海縣南小王莊平地泉湧如輪上源合

此始大逕維州東門外古有石梁金泰和間僧普濟  
所修遺迹尚存又東北過寒亭合漑水入湖由湖入

海漑水出塔山

寰宇記云山形如塔又名漑源山

即今東虞河以州

西有西虞河故此云東西虞出黃山又有朱流河出

方山七里河出蒙姑山三水皆在州西北流入海

巨淀馬車瀆 漢志曰為山濁水所出東北至廣饒入

鉅定又曰馬車瀆首受鉅定東北至琅槐入海定作  
淀水澤名縣因氏焉即今樂安東北清水泊也北出  
為馬車瀆今高家港也淄水濁水入巨淀時水入馬  
車瀆同歸于海南洋橋記乃以鉅定為巨洹河今巨  
洹自壽光東北入黑冢泊巨淀馬車在壽光西北相  
去六十餘里不合漢書首受鉅定之文濁水亦無入

巨洄之理曾子開誤矣

溝洫志東海引鉅定溉田鉅定澤名東海無此澤寰宇記

膠水南定渚渠即漢武所耕處非東海地

膠水 水經云出黔陬膠山今膠州膠西縣西南鐵櫟

山也北逕密州東北鹵山古名五弩山鹵水入焉

寰宇

記膠水出密州諸城縣東嶗山或亦曰膠水出鹵山皆非是

又北逕高密縣東北

入都樂都樂者水經謂之夷安潭秦地圖謂之劇清

池即古藝養澤也張奴水出高密東阜下亦注此澤

自澤北出注新河

張奴水一名墨水水側有張奴店

由河北入于海

其東北入海者膠水之故道差淺而新河為經流新河者至元初萊人姚演建言首起膠西縣東陳村海口自東南趨西北鑿陸地數百里欲通漕直固海口數年而罷余嘗乘傳過之詢土人云此河為海沙所壅又水潦積淤終不能通徒殘人耳演真鄭國之罪人也

姑尤水 左傳昭二十年姑尤以西注齊東界姑水尤水皆在城陽郡東南入海今按沽水有二曰大沽河



出黃縣南蹲狗山

俗名狗兒山

曰小沽河出萊州南馬鞍

山二水俱南流逕膠水縣東南朱毛城東

朱毛即古即墨城

乃相合通名為沽河至膠州東南入海沽水起北海至南海行三百餘里絕齊東界故曰沽尤以西尤即

小沽河耳

沂水 鄭康成云沂水出沂山水經云出蓋縣艾山

寰宇

記艾山一名臨樂山在新泰縣東北三十里

道元則曰沂有二源一出柞

泉山一出魚窮山余按今蒙陰縣東北地名南河川

小阜之下有曰狗泉

泉傍神祠塑黑狗不知何據疑此則臨樂山也

此沂源

也東南逕馬頭固山有泉東流與之合北望沂山五  
十里殊無別源據周禮沂山因沂水得名康成又齊  
之大儒不應有誤疑沂山水源古流今竭耳沂水過  
馬頭固南流逕蓋縣故城又南至沂水縣城西又南  
至河陽村桑泉水西來入焉道元云桑泉出五女山  
南流納堂阜水即今蒙陰東北憚阜大小二河也又  
南合蒙陰水通名為汶河東注沂

水經桑泉亦稱汶故今云沂水

又南逕諸葛城又南逕王祥墓孝感水入焉其水出墓西戚溝湖剖氷躍鯉之地又南至沂州城東小沂水西來入焉小沂出蒙山西東過費縣神山納枋水枋出縣南關陽川至沂州西又分為涑水涑自州城西小沂自城北俱入沂宋慶歷間沂州修城碑云大小二沂環流外轉而小沂尤湍于西北平日波如簾紋清淺可愛及山雨水至如百萬陣馬摩壘而來謂此水也沂水又南分流入三十六穴湖東通沭水詳

見沫水條又南逕古郾城又南至下邳入泗下邳古城在今邳州南道元云沂水至下邳分為二一自城北趨西南入泗一自城之東南入泗東沂水上有橋

郡國志謂之長利池

徐泗間呼為圯

音怡橋也

子房遇黃石公進履

處今入泗者西沂耳

沫水 水經註大弁山與小泰山連麓沫水出焉

大弁今訛

作大屏

漢志謂之術水元和志云俗名連水出沂山東

麓經大峴山峴水入焉

穆陵關南入沫之水

又南至老牛嶺

嶺長

二十里折而東逕嶼山嶼水入焉嶼水出嶼山水經謂

之箕水又南至洛山洛水西來入焉洛水出壇頭山

又南經莒州城東又南沙河水西來入焉沙河首受

西湖水湖受黃華諸水皆莒城西北羣山泉瀦為湖

又南溫泉西來入焉

泉出沂州東北陽山古名溫水阪昂足三穴沸如湯道元謂西

入沂非也

又東逕倉山

道元云山上有鹽官城即漢封劉釘之利城武陽溝水出此東入沭

今屬贛榆縣

馬嶺羽山

極鯨山也元和志在臨沂縣東南百十里是也

由吾

寰宇記巨

平山南有由吾廟隋文帝徵道士由吾拜諫議大夫卒葬此山水經又云沭水經司吾山東疑即巨平山

也漢有司吾縣羣山聯絡汴東沂西夾山而行山峽之間有

山口池者俗云禹鑿沂水由三十六穴湖貫此峽口

與汴相通

道元謂辟陽水首受葛陂水入汴者蓋此水也今沂州東北有葛溝也

又南

至汴陽縣入桑堰湖

烏侯切道元謂桑堰水出桑賁東入汴湖因此名元和志云碩

護湖在汴陽縣東八十里與胸連水縣三分湖為界今訛作桑口湖

由湖東出入于海

汴水至此正名連水故縣氏焉道元又謂汴水下流

古分為二

今名南連北連

魏正元中齊王鎮徐州立大堰遏

水西流兩瀆之會置城防之名曰曲汴戍其流西入

淮陽由下邳入泗余按宋金相拒宋人亦堰此水乃防北敵遺迹在今海寧沭陽界中

洧水

音加俗作去聲讀

洧水有二東洧出沂州西北其山

城內

普照寺有金僧居山頌碑作其山

南流至卞莊站

國初立站今廢

東分一支

入芙蓉湖溉田數千頃湖在沂州東南芙蓉山下香

粳鍾畝古稱琅邪之稻即此西洧出嶧州東北抱犢

山東南流至三合村與東洧合

又有魚溝水出浮丘山合於此故名三合

南貫四湖溉田倍芙蓉又南合武河入于泗謂之洧

口淮泗舟楫通焉元和志云承縣界有陂十三所皆  
貞觀以來修立以溉田者今沂嶧二州仰泐承二水  
溉田青徐水利莫與為匹皆十三陂之遺迹也武河  
者疑即漢志冠石山之武水水經亦謂之小沂上流  
有故渠俗名文河土人云浚此渠六十里使武河通  
沛可避呂梁徐洪之險而徑達新濟矣徐邳人恐徒  
河無業每沮之

承水

音澄漢縣名

元和志云承縣以西北承水得名寰宇



記云承治水出縣西北方山王莽改承縣為承治故  
水有此名今又訛為承治奉出嶧州北六十里花盤  
山之車梢峪源曰滄浪淵淵旁有龍祠宋政和間賜  
額霖澤廟其水南流合許池泉今滄浪淵水微細不  
及獨許池為正源矣承水又南逕州城西門又南納  
金注河又東會武河南入于泗承水溉田千餘頃旁  
多美竹人賴其利

南梁水

後漢志魯郡蕃縣

蕃音皮

有南梁水道元曰蕃

縣東北平澤泉岩輪焉南鄰于鄒亦謂之西鄒水首  
受蕃縣西注山陽湖陸二水皆由沛入泗今按南梁  
水出滕縣荆溝村西南流至滕州東門外折而過城  
北又西入山陽湖山陽俗曰刀陽由湖南出注于泗  
南有薛水即古鄒水出州東高山春秋魯取邾田自  
鄒水杜注水出東海合鄉縣西南經魯國至高平湖  
陸縣入泗蓋此水也又有沙河水出鄒嶧山皆西南  
流至山陽湖與南梁相合同入于泗名三河口

般陽水

籠水 水經註作龍水南出長城中衆宇記云古名孝

水齊有孝婦顏文姜事姑孝養遠道取水不以寒暑  
易心感得靈泉生於室內文姜常以緝籠蓋之姑怪  
其須水即得值姜不在入室發籠觀之水即噴涌壞  
其居宅故俗呼為籠水今孝婦河也出益都縣顏神  
鎮孝婦祠下

古齊長城踰泰山東亘于此

西逕萊蕪山陰北注般

陽城西般水入焉般亦名左阜水出淄川縣東南龍

山龍灣洞俗名頭河西北流至般陽城東分為二  
支逕城南一支環城西北俱入籠故水經云般陽縣  
在般水之陽也籠水又北逕長山縣西又北逕鄒平  
縣東蒙河水入焉蒙水俗名沙河出長白山葫蘆峪  
水經謂之魚子溝又北逕新城縣西又北入小清河

### 濟南水

灤水

源曰趵突流曰  
灤東導曰小清

曾南豐齊州二堂記曰泰山北與

齊東南諸谷之水西北匯于黑水之灣又西北匯于

柏崖之灣而至于渴馬之崖則泊然而止

今黃山下

自崖

以北至于歷城之西蓋五十里有泉湧出高或致數尺名曰趵突之泉齊人謂嘗有棄糠于黑水灣者見之于此其注而北則謂之濼水春秋桓公十八年會齊侯于濼是也今府城西平地泉源感湧雪濤數尺聲如隱雷旁合馬跑金線諸泉周可數畝北出又合蜜脂五龍衆泉竝城北流屈而東至城北水門大明湖水出而注之東北至華不注山合華泉

即齊頃公下如華泉

取飲者三齊記云歷山下有無底井與此泉通山之西南引水溉田水經謂

之歷水陂餘波西注大清曰聽水即今之響河古樂水自華不注山東北入大清河偽齊劉豫乃導之東行為小清河自歷城東逕章丘鄒平又東逕般陽之長山新城又東逕高苑至博興合時水東北至馬車瀆入海曲行幾五百里故自濟南東傳博興南源衆水古入濟者今並入小清焉小清為運鹽河初行高苑縣北金皇統間縣令高通改由縣南長沙溝然

此水迂曲上流岐淺鹽舟多梗議者欲引孝婦水西注上流非計也蓋小清舟不過欲達大清耳若自博興引渠至蒲臺立堰平原僅五十里徑達大清矣

大明湖 水經註灤水北為大明湖西有大明寺水成淨池池上有亭湖水引瀆東入西郭而側城北注又上承東城歷下泉源競發北流出郭注灤水詳此則大明湖亦源于灤城西五龍潭側古有北渚亭豈池亭遺跡邪湖今在府城內周十餘里即歷下泉源競

發北流出郭者也歷下名泉有曰金線東曰皇華

曰柳絮曰臥牛金線東曰東高曰漱玉金線南曰無憂曰

石灣南曰酒泉曰湛露無憂西曰蒲井曰北煮糠突

北曰北珍珠白雲樓前曰散水曰溪亭北珍珠東曰濯纓北珍珠西

曰灰泉濯纓西北曰知魚灰泉東南曰朱砂灰泉泉最大自北珍珠

以下皆匯於此周回廣數畝當是大明湖之源也曰劉氏北珍珠西北曰雲樓劉氏

南曰登州曰望水萬竹園內曰洗鉢登州東北曰淺井曰馬跑

洗鉢西南曰舜泉舜祠下曰香泉舜泉西曰鑑泉舜泉南曰杜康



南舜廟

曰金虎曰黑虎

李承務巷

曰東蜜脂

金虎西南

曰西蜜脂

東蜜脂西

曰孝感

孝感坊內

曰玉環

同知巷前令憲衙街

曰羅姑

塌行街東

曰

混沙曰灰池

城西南角場下

曰南珍珠

鐵佛巷東

曰芙蓉

姜家亭前

曰

滴水

又名清泉西務北

曰灰灣曰懸清

城西五龍堂東

曰雙桃

城西丁字

街北曰溫泉

城西石橋北城下

曰汝泉

神童寺內

曰龍門

一名龍泉神童寺東

曰染池

龍門東

曰懸泉

中宮東

曰都泉

中宮東南

曰柳泉

曰車

泉

中宮東遠東莊

曰煮糟

四里山南

曰爐泉

南山下

曰白虎

曰甘露

大佛山

曰林汲

佛峪內

曰白泉

王舍店北

曰金沙

曰白龍

龍洞山中

曰花泉

張馬泊

曰獨孤

靈巖寺

曰醴泉

賢堂嶺北

曰漿水

盤水鎮東

南

曰南煮糠

螭山窩北

曰苦苣

柳鋪東

曰熨斗

黎峪門家莊

曰鹿

泉

石固寨

曰龍居

長城嶺西

合趵突百脈總七十二見名泉

碑然遠至中宮靈巖諸泉具載而華不注之華泉明

水鎮之淨明泉皆失不取況其名亦未甚雅稱蓋當

時俗筆欽嘗擬會波樓記略云濟南山水甲齊魯泉

甲天下蓋他郡有泉一二數此獨以百計濤噴珠躍

金霏碧渟韻琴筑而味肪醴不殫品狀在邑者瀦市

卷二  
之半在郭者環城之三綦布星流走城北陬匯于水  
門東流為灤竝于汶過于時入于海可槩見矣

百脈水 水經出土鼓縣故城西元和志出亭山縣東

北

亭山在府城東南九十里

源方百步百泉俱發故曰百脈即繡

江源也郡國志云十二斤溝俗名麻灣出章丘縣南  
明水驛明水一名淨明泉出百脈西北石橋邊其泉  
至潔纖塵不留土人以洗目退昏翳與西麻灣水合  
流三里餘入繡江乃東北流逕東陵山漸章丘東城

又北入小清河縣東七里有楊緒水一名獺河水經  
云出逢陵故城西南經章丘城北入濟水今按獺河  
出長白山之王村峪經章丘東北入小清河 曾南  
豐齊州二堂記云太山之北與齊東南諸谷之水西北  
匯于黑水之灣又西北匯于柏崖之灣而至于渴馬  
之厓泊然而止至歷城西湧出趵突之泉嘗有棄糠  
於黑水灣者見之于此其注而北謂之灤水齊多甘  
泉顯名者十數而色味皆同皆灤水之旁出者蔡氏

援此以證濟水之伏破程氏之論當矣又取沈存中  
筆談謂歷下發地皆泉濟水經過其下自相矛盾何  
邪且古濟行清河如在井底南仰泉源遙在山麓豈  
能相及今黃山渴馬厓水伏而可證又龍洞山中朗  
公谷諸水東西伏流土人云西發趵突東發百脈驗  
之信然蓋歷下衆泉皆岱陰伏流所發西則趵突為  
魁東則百脈為冠地勢使然何闕于濟存中得之傳  
聞九峯按圖索駿容有疑誤近官濟南者遂定以灤

為濟建濟瀆廟于泉上謬矣

巨合水水經註巨合水南出雞山北逕巨里故城耿弇  
討費敢處又北合武原水入濟按巨里在歷城東七  
十里自宋為龍山鎮巨合水出鎮南五十里曰榆科  
泉逕巨里西武原水出鎮南十餘里曰江水泉逕巨  
里東俗訛為東西巨冶河俱北流五里餘乃相合北  
入小清河巨合之得名以此道元云巨里三面有城  
西有深坑坑西即耿弇營蓋二水環遶因崖以城為

險固也

大清河

古濟  
今汶

水經註濟枯渠注巨野澤澤北則清水

巨野今梁山泊也北出為清河古自壽張縣安民亭

亭北對安民  
山今曰安山

合汶水文出泰安萊蕪縣原山之陽水

經謂之北汶西南逕徂徠山陰又西逕泰山之陽漢

武明堂遺跡臨水謂之石汶又西逕汶上縣北又西

逕東平城南其西即安山閘閘下泥河口有亭子店

古安民亭遺趾清濟與汶合處今閘清水南導任城

則清濟不入汶汶自行古清河矣汶水又北逕漁山  
東即瓠子歌之吾山在安山東有漢隄遺跡自西而  
東屬之麓山西曹子建冢山東漢黃河故渠又北逕  
陽穀縣西流水合狼水入焉又東北逕東阿縣道元  
云縣東北有清亭春秋隱四年遇于清以河得名也  
又東北逕平陰縣廣里保古齊長城防門河道所由  
春秋齊侯塹防是也廣里見水經又名光里又北逕  
巫山齊侯登以望晉師者俗訛作無兒山山上有石



室水經謂之孝子堂今曰郭巨廟清水過此古為涓

湖又東北逕齊河縣縣南門外有梁跨水古朝陽橋

遺跡耿弇渡處

齊河縣在宋為耿濟鎮

沙溝水出山在縣南

來入焉

今肥城縣東南有沙溝鎮以水得名

又北逕上樂橋北樂水分

響河入焉

古名聽水

又東北逕華不注山陰又東逕下樂

堰樂水舊入濟處堰南即小清河又北逕臨邑縣又

東北逕陽縣又北逕齊東縣

河間路屬縣古東鄉

又東北逕蒲

臺縣又東北逕高苑縣北又北逕利津縣城東又東

北入于海

水經云濟至古平安為淵渚謂之平州坑又東北至琅槐鄉有古黃河通濟枯渠謂

之漯河又東北入海元和志謂海浦浦旁有一沙阜高丈餘俗呼鬬口淀濟水入海與海潮相鬬故名淀

上有井極甘朱子韓文考異曰按水經河水至東阿海潮不能沒

荏平等縣東北流四瀆津灌注之河水東分濟水受

河蓋滎口水斷不通始自是出與清水合昔趙殺鳴

犢孔子臨河而嘆作歌曰狄之水兮風揚波舟楫顛

倒更相加歸來歸來胡為期按臨濟故狄也是濟所

經得其通稱詳此則是濟水自滎澤之下潛流至此

四瀆津口而復出河又東分一支與之合流以過臨濟而為狄水然此皆齊地在今濟鄆之間史記以為孔子自衛將西見趙簡子則其道不當出此此又不  
可曉者今姑闕之以俟深於地理者考焉欽按漢陳留郡平丘縣有臨濟亭故狄也蓋濟水出陶丘北南瀆被孟豬北瀆注巨野亭臨此瀆故曰臨濟春秋時狄人據此因以名焉此水夫子所歌至王莽時枯竭水經所謂濟枯渠注巨野者也其自巨野北出至四

瀆津與河合流者乃齊之清河水經所謂得其通稱者是也漢千乘別有狄縣安帝更名臨濟唐又別以漢東朝陽為臨濟今章丘之臨濟鎮也文公蓋疑于此云

古河 朱文公九歌註曰禹治河至兗州分為九道以殺其溢其間相去二百餘里徒駭最北鬲津最南徒駭是河之本道東出分為八枝也胡氏大記曰大陸澤北九河之地平延漫流易淤故禹多與之地使下

流通曠齊桓擅一時之利適河行徒駭因以八河之地充樹藝立城邑下流始迫溢為患欽按河過大陸趨海勢大土平遷徙不常自播為九禹因而疏之非河獨行經流禹於旁近支鑿以殺其溢也禹後歷三代至齊桓時千五百餘年矣支流漸絕經流獨行亦理勢如此非齊桓冒曲防之禁故塞九河實九河自為平陸可樹藝耳至定王五年河遂南徙矻礫漢世漸決而南元帝永光中決于清河分流入博州後又

決于平原乃東入青齊二州之境遂由漯川與濟竝  
行入海宋紹熙以後乃南連大野并泗入淮金初又  
改由渦近歲復由泗入淮河濁淮泗俱清淮勢大  
可以吞伏故下流無淤塞之患惟汴宋之郊盤屈平  
壤潰決如故自定王以來又千五百餘年河自北而  
南徙千餘里今按桑田之地講求變遷之陵谷欲盡  
合古書難矣漢世去古未遠河隄都尉許商言九河  
故道謂徒駭在成平

金獻州樂壽縣景  
城鎮古有成平城

胡蘇在東光

今景州東光縣東連  
滄州古有胡蘇亭

鬲津在鬲縣

德州有鬲縣城

曰太史曰

馬頰曰覆釜在東光之北成平之南曰簡曰潔曰鈎  
盤在東光之南鬲縣之北斯言簡而近實後世圖志  
雖詳反見淆亂欽嘗往來燕齊西道河間東履清滄  
熟訪九河故道蓋昔北流衡漳注之

今之御河漢初猶入河漢魏時

名漳水隋唐以來名御河

河既東徙漳自入海安知北流之漳非

古徒駭河歟

宋會要神宗熙寧三年議開御河臣寮奏云可以恩州武城縣開約二十餘里

入黃河北流故道下五股河詳此則御河入黃河北流故道無疑也

踰漳而南清滄二

州之間有古河隄岸數重地皆沮洳沙鹵太史等河

當在其地滄州之南有大連澱

今曰大梁五龍堂宋碑作大連疑即隋末

羣盜所據之豆子毓也

西踰東光東至海此非胡蘇河歟澱南

至西無棣縣百餘里間有曰大河曰沙河皆瀕古隄

縣北地名八會口

土人云因河會得名

縣城南枕無棣溝茲非

簡潔等河歟

無棣溝通海隋末廢塞唐薛元鼎開之百姓歌曰新河得通舟楫利直達滄海

魚鹽至昔日徒行今驛馳美哉薛公德旁被凡此溝澱今皆為鹽司堰塞平時瀦水不通纔遇靈雨水即潰溢故河間清滄之地常被水害無有寧歲吾友伯答爾都水嘗言撥丁河數場醮課與山東運司帶辦



廢堰泄水則河間永無患矣東無棣縣北有陷河濶  
執政無識竟沮之良可歎矣

數里西通德棣東至海茲非所謂鉤盤河歟

德州有盤河鎮

濱州北有士傷河西踰德棣東至海茲非鬲津河歟

士傷河最南比他河差狹是為鬲津無疑也

所謂士傷者土

人云昔日戰場因傷賢人故云按水經漢安帝時劇縣賊畢豪等乘船寇平原縣令劉雄門下小吏所輔浮舟追至厭次津戰敗為賊所擒輔求代雄豪縱雄殺輔于此津蓋此河也

蔡氏書傳乃

曰自漢以來講求九河皆無依據祖王橫之言引碣石為證謂九河已淪於海欽按禹貢文北過泆水至

於大陸又北播為九河同為逆河入于海大陸在邢  
趙深三州之地爾雅之廣河澤也去海岸已數百里

大陸又曰鉅鹿呂氏春秋曰鉅鹿之北遂分為九河  
路史云九河始元城大名縣西三里有故瀆鄭夾漈  
謂大陸非趙地之廣河澤乃汲  
郡之吳澤也如此則又遠之矣又東至海中始敘九

河則大陸與九河相離千里如是之遠而絕無表志  
不合禹貢之文其不可信一也王橫謂海溢出浸數  
百里而青兗營平郡邑不聞有漂沒之處而獨浸九  
河其不可信二也今平原迤北清滄之間雖為樹藝城

金史卷二  
卷二  
邑相望而地形河勢高隱曲折往往可尋但禹初為  
九厥後或三或五遷變多寡不同必欲按名而索故  
致後儒紛紛之論不得不辨

海

海岱惟青州謂東北跨海西南距岱跨小海也本

名渤海亦謂之渤海別枝名也蓋太行恒嶽北徼

之山循塞東入朝鮮

麗今高

海限塞山有此一曲北自

平州碣石南至登州沙門島是謂渤海之口濶五百  
里西入直沽幾千里焉漢王橫乃謂九河之地淪為

小海然則唐虞之時青州跨海者跨何海邪且海溢  
出浸數百里何自秦漢以來青兗營平郡縣不聞有  
漂沒之者足證橫失海溢者有之橫言之過也近世  
蔡氏書傳金履祥通鑑前編皆祖橫說又謂小海所  
淪青兗北境悉非全壤豈二州北境有荒漠棄地為  
海所漸而歷代信史不之書邪無是理也蓋因委九  
河於海中指碣石在海外遂有此論今青境無缺茲  
不必辨古兗之地自今濟南以西北包濱棣滄瀛帶

雄鄭西襟深冀南遼曹濮東括魯鄆四至亦不狹矣  
在春秋戰國其地瓜分後世從而小之未詳考也金  
氏又云碣石有二在高麗者曰左碣石在平州者正  
禹貢之右碣石也乃今沙門島對岸之鐵山正當渤  
海之口果為右碣石則唐虞之時青兗東北直岸大  
海無渤海矣此又可信邪今齊境東南則日照即墨  
膠州正東則寧海登州皆岸大海東北則萊蕪昌邑  
正北則博興壽光西北則濱棣二州皆岸渤海云



齊乘卷二